

名醫方考

特別  
79  
458  
6





458  
60

醫方考卷之六

蟲門第六十五

叙曰。為國者必欲去夫蠹國之小人。故為醫者必欲去夫蠹身之蟻蝕。身國不同理相須也。因著六考以療蟲。君子用之。庶幾乎保安之一策也。

化蟲丸

歛色 吳崑著  
從姪 吳子湛 梓

鶴虱去土

胡粉炒

苦練根東引不出土者

檳榔各一兩

蕪荑

使君子各五分

白礬枯二分 五分

量人大小服一歲兒可五分





腸胃中諸蟲為患。此方主之。○經曰。腸胃為市。故無物不包。無物不容。而所以生化諸蟲者。猶腐草為螢之意。乃濕熱之所生也。是方也。鶴虱檳榔苦練根胡粉白礬蕪荑使君子。皆殺蟲之品。古方率單劑行之。近代類聚而為丸爾。

震砂丹

水銀 一斤 硫黃 四兩

二物于新銚內炒成砂。更入水火鼎內煅煉。為末。糯米糊丸。如麻子大。每服三九。加至五七丸。忌猪羊血。菘豆粉。冷滑之物。

腸胃諸蟲。此方主之。良。○掌謂濕熱生蟲。故知濕

熱者。蟲之天也。是方用硫黃以燥濕。用水銀以驅熱。是奪蟲之天矣。蟲失其天。未有不殺。

蟲藥總考

崑按。古方殺蟲。如雷丸貫衆乾漆蠟塵百部鉛灰。皆其所常用也。有加附子乾薑者。壯正氣也。加苦參黃連者。蟲得苦而安也。加烏梅訶子者。蟲得酸而軟也。加藜蘆瓜蒂者。欲其帶蟲而吐也。加芫花黑丑者。欲其帶蟲而下也。用雄黃川椒蛇床樟腦水銀檳榔者。治疥瘡之蟲也。用胡桐淡苈葶子。非子蟬酥者。治齧齒之蟲也。用川槿皮海桐皮者。治風癬之蟲也。用青箱子覆盆葉者。治九竅蠶蝕之



蟲也。用敗鼓心、桃符板、虎糞骨、死人枕、獺爪、勸骨者，驅瘵蟲也。或用桃柳東南枝者，以其得天地春生夏長之氣，而假之以為吾身之助也。或用吳茱萸、東引根，或用酸石榴、東引根，煎湯吞藥者，一以此物亦能殺蟲。一以東方者，生物之始，諸蟲受氣之所也。東引根能引諸藥，東行奪其生生之氣，乃伐根之斧地。

藍

泊宅編云：永州通宅聽軍負毛景得奇疾，每語喉中必有物作聲相應。有道人教之讀本草藥名，至藍而默然，遂取藍搥汁而飲之，少頃吐出肉塊，長

二寸餘，人形悉具。劉思在永州親見其事，千金翼云：藍主疰蝕，則固殺蟲物爾。

雷丸

陳正敏遜齋間覽云：楊勛中年得異疾，每發言應答腹中有小蟲效之，數年間其聲漸大。有道士見而驚曰：此應聲蟲也，久不治延及妻子，宜讀本草。遇蟲不應者，當取服之，勛如言讀至雷丸，蟲忽無聲，乃頓服數粒，遂愈。

檳榔散石榴根煎

蔡定夫戡之子康積，苦寸白蟲，醫者教之以月初三日，前先用炙猪肉一罈置口中，咀嚼其津而勿食。



諸蟲聞香爭啞如箭攻攢却以檳榔細末一兩取  
石榴東引根煎湯調服之茶如其言不兩時腹中  
雷鳴急瀉蟲下如傾以杖挑之皆連綿成串其長  
幾丈尚蠕蠕能動乃悉置之于火宿患頓愈  
古稱九蟲一曰伏蟲長四寸為群蟲之長二曰白蟲  
相生至多形長一寸其母長至四五尺三曰肉蟲  
狀如爛杏令人煩悶四曰肺蟲其狀如蠶令人欬  
而聲嘶五曰胃蟲狀如蝦蟆令人吐逆嘔噦六曰  
弱蟲狀如瓜瓣令人多唾七曰赤蟲狀如生肉令  
入腸鳴八曰螻蟲至微細狀如菜蟲居洞腸間居  
則為痔漏癰疽諸瘡九曰虵蟲長一尺貫心則殺

久又有三尸蟲狀如大馬尾薄筋依脾而居乃有  
頭尾皆長三寸又有勞蟲膈噎蟲癩蟲蠱蟲狐惑  
蟲未易悉舉醫者推類而治之可也

痔漏門 第六十六

叙曰察痔漏者瘍醫之事也君子鄙談之然擇疾  
而療非醫之任者也故考一方以大其規詳論藥  
物以要其變

四物湯加黃芩黃柏槐花方

當歸

芍藥

川芎

生地黃



酒黃芩 酒黃栢 炒槐花

內熱痔漏下血者此方主之。○痔漏廣腸之毒也。內經曰因而飽食經脈橫解腸癖為痔是以痔漏之疾多見於膏粱富貴之人而藜藿之腹未見其多也。一有病根則勞思便作飲酒便作所以然者內熱而血妄行也是方也。生地槐花黃芩黃栢清其熱也。當歸芍藥川芎調其血也。

四君子湯

人參 白朮 茯苓 甘草

年高氣弱痔血不止者此方主之。誤服攻痔之藥致血大下不止而虛脫者亦此方主之。○血有形

之陰也。必賴無形之氣以固之。故年高而氣弱則血下。久藥損氣則血下。是方也。人參白朮茯苓甘草皆甘溫益氣之品也。大氣充盈自足以固有形之血譬之乾元充溢於兩間自能舉乎大地而無傾陷之危者也。

痔漏諸藥總考

崑按古方醫痔漏下血有用槐角灰者有用栢葉灰者有用蝟皮灰者有用露蜂房灰者有用牛角腮灰者有用胡桃灰者俱以方寸匕酒調下此皆枯痔之法也。湯液之中有用防風者有用秦兗者有用皂角仁者有用荆芥白芷者此皆責之風熱



入藏也。有用芒硝、大黃者。有用檳榔、枳實者。此皆  
責之實熱可下也。有用胡黃連者。有用酒苦參者。  
有用石蓮肉者。有用番木鱉者。此皆責之實熱可  
清也。有用桃仁、紅花者。有用蒲黃、蘇木者。此皆責  
之瘀血未消也。有用杏仁、麻仁者。有用地黃、黃柏  
者。此皆責其燥金無液也。有用地榆、斷艾者。有用  
枯龍骨、鹿角霜者。此欲強止其血也。有用象牙、蝮  
螫者。有用人爪、蟹爪者。此欲放出其血而外施藥  
以愈之也。有用薰法者。有用洗法者。有用藥坐者。  
無非枯痔止血之品也。有用插藥者。有用掛線者。  
無非爛肌去腐之輩也。嗚呼。任醫猶任將。用藥猶

用兵。神于兵者。疊石可以為營。驅牛可以破敵。神  
于藥者。心解而機自靈。見超而術自神。有不拘拘  
於紙上之陳言矣。

疥瘡門 第六十七

叙曰。人以弗病為安。疥瘡雖曰小疾。然流連其痒。  
弗息其搔。則亦非可觀之度矣。因著六考。以主之  
庶幾乎無瘡痍也。

防風通聖散

防風 川芎

川歸

黃芩 炒

麻黃 去節



連翹 薄荷 石膏 白朮炒 梔子黑炒  
 大黃 芒硝 桔梗 荆芥 白芍藥  
 滑石 甘草

表有疥瘡。內有實熱。此方主之。○諸痛瘍瘡痒。皆屬心火。故表有疥瘡。必裏有實熱。是方也。用防風麻黃。泚熱於皮毛。用石膏黃芩連翹桔梗。泚熱於肺胃。用荆芥薄荷川芎。泚熱於七竅。用大黃芒硝滑石梔子。泚熱於二陰。所以各道分消其熱也。乃當歸白芍者。用之以和血。而白朮甘草者。用之以調中。爾互考見中風門火門。

玉燭散

川芎 當歸 生地黃 赤芍藥  
 大黃 甘草 朴硝各等分

疥瘡作痛者。此方主之。○諸痛屬實。實者可瀉。故用朴硝大黃瀉其實。生地赤芍涼其血。川芎當歸和其榮。甘草調其衛。是方為攻下之劑。必形氣病氣兩實者始可用之。若病氣有餘。形氣不足者。以前方防風通聖散去大黃芒硝可也。  
 當歸養血湯加防風連翹方

當歸 防風各一錢 黃耆五錢 連翹二錢  
 疥瘡有血無膿。搔痒不止者。此方主之。○有血無膿。此表氣不足也。諸痒屬虛。虛者可補。故用當歸



黃耆大補其氣血乃防風者引歸芪直達于表二  
物得之而効愈速也若連翹者解諸經之客熱而  
已此藥服之數劑諸瘡化毒生膿又更服之得膿  
滿毒盡則去病根而無溫癥之患若膿日久不乾  
者去黃耆加白木茯苓以燥之如治爛豆之法則  
善矣。

十全大補湯

人參 黃耆 白朮 茯苓 熟地黄

當歸 川芎 芍藥 甘草等分 桂少許

瘡久血氣虛弱頸面腹背背瘡者此方主之○瘡  
疥生于手足者為輕生于頸面腹背者氣血虛羸

之盛乃小人道長之象故用人參黃耆白朮茯苓  
甘草大補其氣用當歸川芎白芍熟芩桂心大補  
其血氣血得其補則腹背之瘡先愈而君子道長  
小人道消矣○脾胃門參苓白朮散亦可酌用  
加品

古方有用苦參沙參忍冬花皂角刺者此皆治瘡  
善藥若依前法則此輩不用亦愈必欲用之苦參  
宜用酒炒

疥瘡塗藥總考

古方塗藥有用蛇床子川椒雄黃獐腦水銀檳榔  
者有少入人言者皆殺蟲也有用木鱉子木風子



者皆去風也。有用枯礬硫黃者為燥濕也。有用太黃黃柏輕粉鈆粉黃丹者為解熱也。或以柏油塗者或以麻油塗者或以猪脂塗者。予少時常自用之。率驗於此。而違於彼。今月少愈。再月即發。竟以服藥而瘳。終無益於塗也。然病淺者間有塗之而愈。故塗藥亦所不廢。

暴死門 第六十八

叙曰：幻化之軀不能無死。但曰暴死則非正命矣。君子順受其正。胡然以非命歸耶。故考方法八條。

以拯暴死

六君子湯加大麻方

人參 白朮 茯苓 甘草 半夏 陳皮  
天麻

暴死。口噤吐沫。身體溫煖。脈來虛大者。中風暴死也。此方主之。○暴死者。卒然而倒。不省人事也。風燥則筋急。故冷口噤吐沫者。風盛氣湧。使然。乃風來潮洶之象。風為陽邪。故冷。身體溫煖。脈來虛大者。正氣虛而邪氣盛也。斯時也。主辛散之劑。以驅風。則懨懨之氣必絕。非其治也。故用人參白朮茯苓甘草之甘溫者。急固其氣。復用半夏陳皮之辛



利者以平其沫天麻之加定風邪爾

附子理中湯

附子 乾薑 人參 甘草 白朮

腹痛額頭黎黑手足收引脈來沈下無氣以息者中寒暴死也此方主之○腹痛病因固有數種但額頭黎黑手足收引脈來沈下則中寒之驗也所以無氣以息者呼出主陽吸入主陰三陰受其真寒則病不能吸吸亡則呼不能獨存矣故冷入鼻死寒者溫之故用附子乾薑乃人參白朮甘草所以生其呼吸之氣也進藥後更着艾灸其關元此內外交治之法是證也有死一日夜而治之復甦

者幸勿因其危而忽之

生脉散加香薷方

人參 麥門冬 五味子 香薷

人本陰虛復遇暑途飢困勞倦暴仆昏絕者此方主之○人本陰虛則陽獨治復遇暑途則陽易亢加之飢困勞倦則陰益虧所以暴仆昏絕者一則陰虛而孤陽欲脫一則暑邪乘虛而犯神明之府也故用人參益元而固脫香薷辟邪而卻暑麥冬之清所以扶其不勝之肺五味之酸所以斂其欲脫之真

四君子湯加竹瀝薑汁方



人參 白朮 茯苓 甘草 竹瀝 薑汁  
暴死有痰聲者。名曰痰厥。此方主之。○痰厥者。虛陽載痰上逆之名。所以令人暴死者。頑痰塞其清陽呼吸之道也。痰既塞之。氣欲通之。故冷喉中有聲。經曰。壯者氣行則愈。怯者着而成病。故用人參白朮茯苓甘草之溫補者。以壯氣佐之。竹瀝薑汁以行痰。

獨參湯

人參 二兩 去蘆煎  
行立之間。暴眩仆絕。喉無痰聲。身無邪熱者。陰虛陽暴絕也。此方主之。○陰陽之在人身。互為其根。

而不可離者也。若陰道虧乏。則孤陽無所依附。亦自飛越。故冷入暴眩仆絕。過不在痰。故無痰聲。病不因感。故無體熱。斯時也。有形之陰血不能急生。無形之呼吸所宜急固。况夫陰生於陽。又太極之妙乎。故以獨參主之。取其為固元益氣之聖品爾。  
五磨飲子

- 木香 沈香 檳榔 枳實 台烏藥
- 五件等分白酒磨服

暴怒暴死者。名曰氣厥。此方主之。○怒則氣上。氣上則上焦氣實而不行。下焦氣逆而不吸。故冷暴死。氣上宜降之。故用沈香檳榔氣逆宜順之。故用



木香烏藥佐以枳實破其滯也。磨以白酒和其陰也。

火醋薰鼻法

凡感臭穢瘴毒暴絕者。名曰中惡。不治即死。宜燒炭火一杓。以醋沃之。令患者鼻受醋氣。則可復甦。既甦。以感胃門。藿香正氣散主之。

禮拜法

凡遇屍喪。既古廟入無人所居之室。及造天地鬼神壇場。歸來暴絕。面赤無語者。名曰尸疰。亦曰鬼疰。即中崇之謂也。進藥便死。宜移患者東首。使生人焚香北面禮拜之。更行火醋薰鼻法。則可復甦。

否者七竅逆血而死

凡男婦交感而死。在男子名曰脫陽。在女子名曰脫陰。男子雖死。陽事猶然不萎。女子雖死。陰器猶然不閉。亦有夢中脫死者。其陽必舉。陰必泄。尸容有喜色。為可辯也。皆在不救。

痘門 第六十九

叙曰。小兒壯熱。呵欠頓悶。時發驚悸。或吐或瀉。手足時冷。面頰顯赤。嗽嚏者。為痘證也。蓋痘出于五臟。由內達外。是以各顯其證。呵欠頓悶。肝之證也。



時發驚悸心之證也。或吐或瀉手足時冷者脾之證也。頰赤嗽嚏肺之證也。錢氏謂獨有腎藏無證此大不然。若腰痛喜寐則腎之證矣。五藏之證盡顯者其痘必多。但顯一二證者其痘必少。魏氏以痘本於淫火其言高出前古。雖其主方近於執一然錄古人一十四方則示人以變通也。所知矣。今世之醫率以是短之使諸子者竝作于九原。崔遇魏氏則北面而師之。遇錢陳則宿隨而已。所以然者二子之資不及魏也。茲考群方則以百家而出入之初不拘拘於三子矣。

痘證三四日前諸方考

升麻葛根湯

升麻 葛根 各二錢 白芍藥 半錢 甘草 一錢

小兒初間發熱壯盛為風寒為痘疹莫能的辯此方穩當宜主用之。○表熱壯盛此邪實於表也。經曰輕可以去實。故用升麻葛根以疏表。甘草佐之可以和在表之氣為藥佐之可以和在表之榮。去其實邪和其榮衛風寒則解痘疹則出誠初間之良劑也。如至四五日痘中夾疹者亦此方主之。疹散只依常法治痘。

參蘇飲

紫蘇

陳皮

半夏

茯苓



乾葛 前胡 桔梗 各一 甘草 五分

人參 七分

風寒壯熱體重頭痛痰嗽壅盛者此方主之。○風寒客于外故用紫蘇乾葛以發表痰嗽壅于內故用半夏前胡桔梗陳皮茯苓以安裏邪去之後中外心虛人參甘草急固其虛此則表和而痘易出裏和而氣不虛表裏無失斯良劑矣。

麻黃湯

麻黃 杏仁 甘草 桂枝

天寒腠密表熱壯盛者此方主之。○解表之藥有三品辛涼辛溫辛熱也。夏月表氣易泄宜用辛涼。

春秋表氣平調宜用辛溫。若天寒之時表氣閉密辛涼辛溫不能解散故以麻黃桂枝之辛熱者以主之亦各當其可而已。佐以杏仁利其氣也。佐以甘草和其氣也。

惺惺散

人參 白朮 甘草 細辛

發熱之初未明是痘形體怯弱者此方主之。○人參白朮茯苓甘草防其虛也。乃細辛桔梗所以疏其陽。天花粉白芍藥所以和其陰。加味紅綿散。



天麻 麻黃 荆芥穗 全蝎

薄荷 紫草 蟬退等分

抱龍丸  
風熱驚搐者以此藥調抱龍丸。○痘之出也。自內達外。心熱則驚。肝熱則搐。所以搐者風也。所以驚者熱也。是方也。麻黃荆芥薄荷天麻全蝎蟬退所以消風解熱。乃紫草者所以解毒發痘而活血也。

天竺黃兩 膽南星兩 辰砂五錢水  
雄黃 琥珀 珍珠各三錢  
麝香二分 檀香 人參各二錢  
木香 沉香各一錢 金箔二十

甘草汁為丸如大豆大每服一丸嬰兒半丸。

痘前發驚者此方主之。○明者可以安神。故用琥珀珍珠重者可以去怯。故用辰砂金箔氣竅可以利竅。故用雄黃沈檀木麝香溫可以固元。故用人參辛燥可使開痰。故用南星寒涼可使清熱。故用竺黃。

羌活透肌湯

羌活 陳皮 柴胡 前胡 半夏 茯苓  
甘草 桔梗 川芎 當歸 山查

痘出見點未盡者此方主之。○表氣未疏則出有不盡。故用羌活柴胡前胡川芎以疏表裏氣未利。



則出有不速故用半夏茯苓陳皮甘草桔梗以調  
裏當歸活表裏之血山查消表裏之滯並活滯  
則痘之出也易易矣

透肌散

紫草二錢 木通半錢 白芍藥酒炒 人參

蟬退 升麻 甘草各五分

氣弱痘出不盡者此方主之。○人參甘草能益氣  
而補中。紫草木通能透肌而起痘。升麻蟬退能退  
熱而消風。乃方藥者所以調陰氣而和榮衛也。

甘桔湯

甘草二錢 桔梗三錢

咽喉腫痛者此方主之。○甘草之甘瀉實火而補  
虛火。桔梗之苦清喉熱而瀉氣熱。

消毒飲

牛旁子二錢 荆芥穗一錢

生甘草 防風各五分

咽喉腫痛膈上熱盛者此方主之。○牛旁子疏喉  
中風壅之痰。荆芥穗清膈間風壅之熱。生甘草緩  
喉中風壅之氣。乃防風者散諸風不去之邪也。

加味如聖散

桔梗二錢 牛旁子 麥門冬各一錢

甘草 玄參 荆芥各一錢



防風分七

生犀角

黃芩各五分

痰嗽風熱聲啞喉痛者此方主之○牛蒡子麥門冬療風痰而清肺熱荊芥防風散風邪而升鬱熱甘草桔梗黃芩利咽喉而清氣熱犀角玄參涼心膈而療結熱熱去則金清金清則聲啞瘥矣

紫草化毒湯

紫草錢二

陳皮錢一

升麻

甘草各五分

小便赤加木通

痘已出未出熱壅不快並宜服之○紫草活竅利血化毒陳皮快膈消痰利氣升麻消風發散瘡癩其草補虛和中解熱木通之加為導熱邪由溺而

泄瀉

前胡化斑散

酒紅花

當歸各一錢

前胡分八

荊芥分四

白芷

甘草節

赤芍藥

陳皮各五分

鬱金七分

酒浸胡荽子三十粒

痘中夾斑之輕者此方主之○斑之淡紅色者斑之輕也治痘中之斑與傷寒雜證不同傷寒之斑宜主寒涼痘中之斑寒之則血凝而痘不起雜證之斑間用溫補痘中之斑補之則血溢而斑愈盛此方用酒紅花當歸赤芍藥所以活斑中之血前胡白芷陳皮荊芥所以利表裏之氣乃胡荽子甘



草節酒鬱金皆所以散滯氣爾。所其為藥利榮調  
衛不寒不熱誠得治痘斑之理也。師云斑證之原  
由初間不能清熱解毒若能於初間清熱解毒胡  
然有斑。

再造丸

生玳瑁一兩 片腦三錢 水蛭炒黃一錢

蜈蚣炒三錢 麻黃去節一兩

猪尾血為丸龍眼大每服一丸日一二得微汗吉  
痘中有赤黑斑狂言煩燥者此丸主之。○原是實  
熱之證失於清熱化毒則令痘中夾斑治之失道  
則熱益盛而斑赤黑矣若以手按之血散者可治。

是方也。生玳瑁能解毒而化斑蜈蚣能從毒而化  
毒水蛭能散瘀而破血片腦能化氣而利竅麻黃  
能透肌而達表和之以猪尾血取其動而不滯爾  
黃連解毒湯

黃連炒 黃柏炒 黃芩炒 梔子炒黑

裏熱壅盛者此方主之。○無熱固不化毒熱壅則  
毒亦不化故用黃連瀉心火黃芩瀉肺肝之火黃  
柏瀉腎火梔子瀉上下之火無他證而惟熱壅故  
用藥亦精專焉。

人參白虎湯

石膏三錢 人參 甘草 桔梗各一錢



知母 二錢

裏熱渴甚者此方主之。○石膏清胃熱胃清則不渴。人參知母甘草桔梗化氣而生津液液生則渴自除。

辰砂益元散

滑石 六錢

甘草 淨末 一錢

辰砂 水飛 二錢

裏熱小便黃赤神氣不清者此方主之。○滑石清利六府甘草解熱調中辰砂安神去怯

加味導赤散

生地黃

人參

麥門冬

木通

甘草 等分

竹葉 十片

燈薪 七根

小便黃赤口乾煩渴者此方主之。○內熱故用生地黃小便黃赤故導以木通竹葉燈薪口乾煩渴故潤以人參麥冬甘草乃氣化而津液自生也。

七正散

車前子

赤茯苓

山梔仁

生甘草 稍

木通

扁蓄

龍膽草

小便秘澀者此方主之。○治痘而必欲利小便者水循其道而後地平天成故也。是方也。車前能滑竅赤苓能滲熱木通能通滯山梔能瀉火草稍能通竅扁蓄能利水。龍膽草能利熱七物者導其熱邪正其中氣故曰七正。



四順清涼飲

大黃

當歸

芍藥

甘草

實熱內壅腹脹秘結，痘不能出者，此方主之。○痘以熱而出，固不能以無熱。若實熱內壅，腹脹便秘，則二焦之氣不化，而痘不能以出矣。故用大黃通其滯，當歸活其血，芍藥養其陰，甘草調其胃，通利之後，表裏氣血皆承順矣。故曰四順。

蜜棗導法

形質虛弱而大便秘結，不堪下者，用蜜熬滿水成珠，撚作棗子狀，用雞翎為心，少粘皂角末，納入穀道中，病人以手急抱，即出之，便隨通矣。此以正氣

怯弱不堪攻下故爾

痘證五六日間方藥考

活血散

木香 二錢

當歸尾 酒浸焙乾

赤芍藥 酒浸炒

川芎

紫草

酒紅花 各五錢

血竭 一錢

每服三錢

痘中氣血凝滯者，此方主之。○氣貴利而不貴滯，血貴活而不貴凝。木香、川芎調其氣滯，芍藥、歸尾、紫草、紅花、血竭理其血凝。

退火回生散

滑石 水

辰砂 水飛各一錢

冰片 三枚



每用冷水調服一錢

痘證血熱枯澁者此方主之。○火炎則水乾是故枯澁。用滑石辰砂導去其熱。此竈底抽薪之意。入水片者欲其速達而無壅滯也。

犀角地黄湯

犀角生 牡丹皮 白芍藥 生地黄等分

諸見血朱血血熱者此方主之。○心主血生地黄所以涼心血肝納血白芍藥所以和肝血火能載血牡丹皮所以去血中之火熱能行血生犀角所以解諸經之熱

白木茯苓澤瀉湯

白木 茯苓 澤瀉各一錢

痘而水泡者此方主之。○中有實熱。膈有停水。濕熱外行。初則痘色晶亮。頃則痘皆水泡矣。此乃水不能潤下。竈底燃薪。釜中發泡之義。是方也。白木甘而燥能益土以防茯苓甘而淡能益土以決防澤瀉鹹而潤能潤下而利水。水利濕消。泡自瘳矣。

補中益氣湯

人參 黃耆 白朮 當歸 柴胡 升麻 陳皮 甘草

中氣虛弱痘不起脹者此方主之。○難經曰氣主



吟氣以溫之。虛口出氣曰  
喘。氣出則由屬陽故溫。

兩之故。氣者噓長萬物者也。痘不起。脹氣之弱也。可知矣。故用人參黃耆白朮甘草以補氣。用柴胡升麻以升陽。有當歸可以活其榮。陳皮可以利其氣。

保元湯

人參二錢 黃耆三錢 甘草一錢 肉桂每用五分  
氣虛陷頂者。此方主之。○氣者長養萬物者也。氣盛即物壯。氣弱即物衰。故痘瘡陷頂者。責之氣虛也。魏桂常自論云。人參益內。甘草和中。實表宜用。黃耆助陽。須憑官桂。前三味得三才之道。體後一味扶一命之顛危。

四物湯

當歸 川芎 白芍藥 熟地黄  
痘根淡。血弱者。此方主之。○痘至五六日。氣尊血附之時。痘根淡者為血弱。故用當歸活血。川芎行血。熟地補血。芍藥斂血。

當歸活血湯

當歸 川芎 赤芍藥 紅花 紫草各一錢  
生地黄一錢五分  
取汁更良  
血熱壅滯者。用此方活血涼血。○色紫為血熱。色枯為血滯。熱者涼之。枯者澤之。調血之道也。是方也。生地黄涼血之品也。當歸川芎赤芍藥紅花紫



草滑血之品也。涼者性寒。滑者質潤。氣利而已。

內托散

人參 黃耆 甘草 當歸 川芎 白芍藥  
厚朴 防風 白芷 肉桂 木香 桔梗  
表虛裏實。氣血皆弱者。此方主之。○在表者。痘頂  
灰陷為氣虛。痘根色淡為血虛。若息重氣粗。則為  
裏實。氣虛故用人參。黃耆。甘草。血虛故用當歸。芍  
藥。川芎。然防風。白芷。肉桂。能引諸藥自內而托之  
於外。木香。桔梗。厚朴。能調壅實。以歸于和。○加減  
法。紅紫黑陷屬熱毒者。去桂。加紫草。紅花。黃芩。淡  
白灰陷屬虛寒者。加丁香。香溫。裏肉桂。溫表。當貫膿

而不貫膿者。倍參耆。當歸。糯米煎熟。入人乳好酒  
八珍湯

人參 白朮 茯苓 甘草  
當歸 川芎 芍藥 地黃

氣體虛弱。痘證雖順。此方主之。○醫貴未然之防。  
痘證雖順。若氣體虛弱。不補恐有後失。故用人參  
白朮。茯苓。甘草。以補氣。當歸。川芎。芍藥。地黃。以養  
血。

獨聖散

川山甲 兩 炒一 麝香 錢一 紫草湯調下一錢  
五六月間黑陷者。此方主之。○黑陷危證也。黑者。



穢惡觸之而變其色也。陷者正氣下陷不能起脹也。川山甲麝香。腫腥穢惡之屬也。何以用之。蓋痘之爲物。外觸穢惡則向裏而陷。內觸穢惡則向外而凸。原其血氣虛怯。故令如此。人牙散亦是此意。

挑疔散

紫草

雄黃

巴豆

各等分

共爲細末。油臘脂調用。

有痘疔痘母者。用針挑破。以此藥少許着之。○痘疔之色有二。紫疔白疔也。痘疔之見有三。先疔見在面。次疔見在腹。後疔見在足也。是方也。紫草解毒利竅。雄黃解毒利氣。巴豆化毒拔疔。乃挑疔之

捷劑也。所謂痘母者。初出之時。遍身光潤。稀少綻凸。其間有一二顆起發脹大。如八九日痘者。名曰痘母。急以此藥挑破着之。否則諸痘日漸隱沒。以至於無。皮膚之外。僅存渣滓。身冷自汗。吐瀉煩燥而死矣。

痘證七日八日九日間所用方藥考

內解散

人參 黃耆 甘草 白芍藥 川山甲  
當歸 川芎 木香 金銀花 皂角刺  
山查 乾薑

七八日間。痘色枯淡不起。無漿者。此方主之。○痘



至七八日。灌膿起脹之時也。若根窩色淡者。責其血弱不起無漿者。責其氣虛。故用人參黃耆甘草大補其氣。又用當歸川芎白芍。大補其血。川山甲皂角刺金銀花。長於化毒。乾薑木香。山查長於化滯。

托裏散

- 人參 黃耆 甘草 肉桂 白芍藥
- 當歸 川芎 連翹 貝母 山查
- 陳皮 桔梗 木香

補虛托裏。此方通用。○人參黃耆甘草。補氣藥也。佐之以山查木香。則氣不滯。當歸川芎。為藥補血。

藥也。佐之以肉桂。則血不滯。桔梗連翹。疏氣清熱。陳皮貝母。利氣開痰。  
肉豆蔻丸

- 肉豆蔻 赤石脂 各三
- 訶子 砂仁 木香 枯礬 各一
- 龍骨 各二

七八日間大瀉者。此方主之。○痘至七八日。灌膿起脹之時也。若大瀉而虛其中。則痘必陷下。而不可為矣。然有濕而瀉。有滑而瀉。有積而瀉。濕而瀉者。宜燥之。枯礬石脂是也。滑而瀉者。宜澀之。龍骨訶子是也。積而瀉者。宜消之。豆蔻砂仁是也。乃木香者。調其滯氣。和其腹中而已。



黃芩芍藥湯

條芩 芍藥 升麻等分 甘草葶半

腸胃熱瀉者此方主之。○糞色黃褐為熱瀉。條芩可以清之。芍藥可以寒之。升麻可以舉之。甘草可以調之。

附子理中湯

附子 人參 甘草 白朮 乾薑

胃中虛寒或又誤服涼藥瀉而手足厥冷者此方主之。○人參甘草白朮之甘溫所以補虛。乾薑附子之辛熱所以回陽。

砂仁益黃散

陳皮 青皮各二錢 訶子一錢  
丁香 木香 砂仁各五分  
食傷胃寒嘔吐而瀉者此方主之。○仲景云邪在中焦則既吐且瀉。故用陳皮青皮理其脾。丁香木香溫其胃。訶子所以止瀉。砂仁所以消食。

十二味異功散

人參 豆蔻 白朮 當歸 丁香 肉桂  
厚朴 陳皮 半夏 茯苓 附子 木香

痘出不光澤不起脹根窠不紅表虛痒塌者此方主之。○中氣有餘氣血充滿則痘光澤起發根窠紅活表無痒塌之患。中氣不足則表亦虛而諸證



作矣。是方也。人參白朮茯苓當歸所以補胃。附子肉桂丁香豆蔻所以溫胃。半夏木香陳皮厚朴所以調胃。胃陽明也。陳氏云。陽明主肌肉。胃氣充足則肌肉溫煖。自然光澤起脹而無痿塌之患。亦見道之論也。

十一味木香散

木香 丁香 肉桂 人參 青皮 大腹皮  
半夏 甘草 前胡 訶子 赤茯苓

裏虛泄瀉而渴者。此方主之。○胃虛而寒則生泄瀉。瀉失津液則令人渴。是方也。人參甘草所以補胃。木香丁香肉桂所以溫胃。腹皮青皮半夏前胡

赤苓所以調胃。乃訶子者所以止瀉而生津也。此亦以胃氣為主。蓋胃不虛寒則瀉自止。津液自生而渴自除矣。○陳文仲云。腹脹渴者瀉。渴者足指冷。渴者驚悸。渴者身溫。渴者身熱。面光白色。渴者寒戰。渴不止者氣急。咬牙渴者飲水轉水瀉。不已者已上。九證即非熱也。乃津液少。脾胃肌肉虛故耳。宜木香散治之。如不愈。更加丁香肉桂。崑謂痘色皸白手足寒。大便溏。小便利。如是渴者虛也。本方主之。若痘色紅赤。大便秘。小便赤。如是渴者熱也。非此方所宜。慎勿與之。

二神散



丁香九粒

乾薑一錢

痘色灰白不起者。此方主之。○氣血原實或以飲食涼劑寒其中氣致痘不起。故只用了香乾薑以溫中而不必參耆等也。

救生散即無此散

獾猪尾血

臘月取以新瓦罐盛掛于當風陰乾為末

牛黃

冰片

麝香

膩粉各一分

硃砂研

馬牙硝各一錢

右為細末。一歲者服一字。大者五分。溫水和乳少許調服。

痘陷色黑危困惡候。此方主之。○痘之為物。外感

穢氣則陷而入。內食穢物則凸而出。故猪血牛黃麝香原皆穢物。可以起痘。乃馬牙硝者所以攻結毒。硃砂膩粉者所以攻結熱。冰片則神於行滯而已。是方也。為熱毒倒入藏府不得已而用之。以少時許取下惡物如魚腦為吉。然非平劑也。

南金散

紫背荷葉

取霜後搭水者

白僵蠶

取直者炒去絲等分

共為末。每服五分。胡荽汁和酒調下。

痘已出而復隱。其勢甚危者。此方主之。○小兒氣體怯弱。外感不正之氣。則痘已出而復隱。荷葉芬香。可以卻穢得震卦仰盂之象。可以升其生生之



氣而長養痘疹佐以白殭蠶一以取其乾毒化毒

一以取其疏利風痰爾  
水揚柳洗法 春夏用葉 秋冬用枝

痘出陷頂漿滯不行或為風寒久尅者用水揚柳枝葉五升水一大釜煎湯先將三分之一置于盆內以手試之勿使其甚熱亦勿使過冷先服宜用湯藥然後入湯浴洗漸漸添湯不可太冷浴洗久許乃以油紙捻燃燈照之曩々然有起勢陷處暈暈有絲此漿影也漿必滿足如不滿又浴加前若體弱者只浴洗頭面手足可也桂島云此猶黃鐘一動而凍蟄啓戶東風一吹而堅冰解腹始雖一物

竟則同一春也

痘證十日以後宜用諸方考

十全大補湯

- 人參 黃耆 白朮 茯苓 白芍藥
- 當歸 川芎 肉桂 甘草 熟地黃

痘證十日以上血氣虛弱者此方主之○參耆苓朮甘草大補氣也芎歸芍地肉桂大補血也氣血平補故曰十全

止痛活血散

白芍藥 酒炒 一錢 為細末酒調下

痘漿已滿血滯疼痛不可忍者此方主之○諸病



痒者為虛痛者為實痒者宜補痛者宜瀉此痛為血實而滯故用芍藥以平血酒調以行滯

如神散

當歸 官桂 玄胡索等分 為末酒調下一錢

血滯腰痛者此方主之○當歸活血官桂散血玄胡理血血行而利腰痛自除

四聖挑疔散

珍珠 豌豆灰 血餘灰各五分 冰片三分

油臘脂調用

瘡中有疔者此方主之○凡瘡中有獨黑獨白獨陷下獨疼痛者名曰疔疔雖以針挑破令久吸盡

惡血以此藥付之失治則餘痘皆陷矣珍珠能出毒止痛二灰能爛毒化血臘脂能利血拔毒冰片能利竅行滯

人牙散

人牙一枚燒存性 麝香少許 共為末酒調下

痘證黑陷者此方主之○痘之為物外感穢氣則陷入內食穢物則凸出牙灰麝香亦穢物耳故用之以起陷中之痘錢氏云變黑歸腎而用骨餘以治之非通論也

蟬退散

蟬退 地骨皮 白芷等分



每服三五分。酒調下。  
表有風熱而痘色滯者。此方主之。○蟬退白芷消  
風熱于表。地骨皮退風熱于裏。

大連翹飲

連翹 白芍藥炒 當歸酒洗 防風  
滑石 柴胡 黃芩 木通各八分  
荆芥 車前子 梔子炒 牛旁子各五分  
蟬退 甘草各三分

痘後蘊熱者。此方主之。○痘焦之後。蘊熱不去。則  
生痘毒是方也。防風柴胡蟬退解熱于表。表有熱  
者。自皮毛汗孔而泄。荆芥牛旁。解熱于上。頭目咽

喉有熱者。從口鼻而泄。滑石木通梔子車前。解熱  
于裏。裏有熱者。導之。從小便而泄。連翹去諸經之  
客熱。黃芩去諸經之遊火。乃甘草者。所以解熱于  
氣。而芍藥當歸。所以調熱于血也。

十三味敗毒散

當歸 陳皮 白芷 赤芍藥 川山甲  
乳香 沒藥 貝母 金銀花 皂角刺  
防風 甘草 天花粉

痘後腫毒。此方主之。○實證補之。則生癰毒。是方  
也。防風白芷。解表而泄其熱。乳香沒藥。散血而消  
其毒。川山甲皂角刺。能引諸藥至有毒之處。金銀



花赤為藥。能解熱毒于瘵壅之中。瘵中諸熱。貝母  
天花粉可除。氣血不調。甘草陳皮當歸可瘵。

瀉肝散

- 當歸 川芎 防風 荆芥 白芍藥
- 甘草 黃連 木賊 蔓荊子 白蒺藜
- 甘菊花

痘後肝經蘊熱。目痛者。此方主之。○目者肝之竅  
肝木藏也。喜散而惡鬱。故散之則條達鬱之則熱  
痛。此方用防風蒺藜荆芥木賊蔓荊菊花。雖所以  
清肝經之風熱。而實所以散之。使其條達也。和肝  
部之血。有當歸芍藥。和肝部之氣。有甘草川芎。復

有黃連瀉心火也。實則瀉其子。以故用之。

復明散

- 當歸 川芎 白芍藥 防風 生地黃
- 荆芥 柴胡 蔓荊子 白芷

痘後目痛。紅絲翳膜者。此方主之。○日月中天。光  
明者也。一為雲物蔽之。明者晦矣。風行天上。則蔽  
障去。而日月復明。此方用防風荆芥柴胡白芷蔓  
荊子。諸風藥以治目翳。亦是道也。復用當歸川芎  
芍藥地黃養血之品者。經曰。目得血而能視。是故  
用之。

清胃湯



升麻 錢二  
當歸 一錢  
牡丹皮 生地黃 各一錢

牙疳腫痛者此方主之。○牙疳責胃熱腫責血熱痛責心熱升麻能清胃黃連能瀉心丹皮生地能涼血乃當歸者所以益陰使陽不得獨亢爾

犀角黃連湯

生犀角 水磨臨飲 加入一錢  
烏梅 一枚  
木香 二分  
黃連 一錢

痘後牙疳此方互用。○諸痛癢瘡痒皆屬心火故用黃連瀉心生犀涼心乃烏梅者取其味酸可以收斂虛邪而木香者取其辛香可以輯和榮氣

走馬牙疳付藥方

黃連 兩一  
雄黃 錢一  
膽礬 三分  
水片 五

患牙疳蝕此方為末搽之。○黃連之苦能堅厚肌肉雄礬之悍能殺蠶蟲水片之辛能利肌腠

治痘瘡濕爛方

或以敗草灰付之或以蠶繭灰入枯礬少許付之或以牆上白蟻窠燒灰付之或以蛤粉付之四法者皆是濕者燥之之意

姪娠患痘宜用方考

草胎散

當歸 川芎 人參 白朮 茯苓 甘草



黃芩 砂仁 柴胡 乾葛 桔梗 紫草  
阿膠 防風 荆芥 白芷 白芍藥

孕婦出痘。此方主之。○以孕婦而痘。則血氣大虛矣。故用當歸川芎芍藥阿膠以養血。又用人參白朮茯苓甘草以補氣。乃黃芩砂仁紫草桔梗所以安胎解毒。柴胡乾葛防風荆芥白芷所以利表疏邪。養血補氣則安其內。解毒疏邪則利其外。安內利外。治道畢矣。

安胎獨聖散

用砂仁炒為末酒調下五分

娠娘出痘胎痛者。此方主之。○胎痛者熱而氣滯

乏故也。縮砂辛溫利而不滯。故可以利氣。可以安胎。

安胎飲

人參 白朮 炒 茯苓 甘草 芍藥 酒  
當歸 川芎 砂仁 紫蘇 黃芩 酒  
陳皮 香附 醋 大腹皮 洗淨

孕娠出痘。此方互用。○氣血虛則胎不安。氣血熱則胎不安。氣血滯則胎不安。是方也。人參白朮茯苓甘草所以補氣。當歸川芎芍藥所以養血。黃芩所以清熱。砂仁香附紫蘇陳皮大腹皮所以行滯。



叙曰。婦人雜病與男子等。惟月事胎產異焉。今所考者。亦考其月事胎產之方。爾他證則向全方求其證治。

四物湯

當歸酒

川芎

白芍藥酒

熟地黄

婦人月事不調。以此方為主。而變通之。○無極之真。二五之精。妙合而凝。乾道成男。坤道成女。女以坤道用事。故治婦人者。以陰為主。方其二七而天。癸至。月事以時下者。女子得坤之陰。陰中必有陽。故以七為紀。一七而齒更。二七而天癸至也。人受

天地之氣以生。故能克肖天地。月天之陰也。以月而盈。以月而虧。故女子之血亦以三十日而一下也。血之下也。同於月。故名之曰月事。經曰。月事以時下。故能有子。是以月事不調者。宜以此方為主。隨其寒熱虛實而斟酌。加減之。使月事調勻。則陰陽和而萬物生有子之道也。是方也。當歸芍藥地黃皆味厚之品也。味厚為陰中之陰。故能益血。枳而論之。當歸辛溫能活血。芍藥酸寒能斂血。熟地甘濡能補血。又曰。當歸入心脾。芍藥入肝。熟地入腎。乃川芎者。徹上徹下而行血中之氣者也。此四物湯所以為婦人之要藥。而調月者必以之為主。



也。○脉數血色紫黑為內熱。本方加黃芩黃連。脉遲血凝結者為寒。本方加官桂附子。人肥有痰加半夏陳皮南星。人瘦有火加山梔黃柏知母。有抑鬱者加香附蒼朮砂仁神麩。有留滯者加桃仁紅花玄胡索肉桂。先期者為熱。後期者為寒。為鬱為氣為痰。氣虛者加參耆。氣實者加枳朴。或問四物亦有不宜者乎。余曰。有之。氣息幾微者不宜川芎。恐其辛香益散真氣也。大便溏泄不宜當歸。恐其濡滑益增下注也。脉遲腹痛不宜芍藥。恐其酸寒益增中冷也。胃膈痞塞不宜地黃。恐其粘膩益增泥滯也。明者解之。昧者誤矣。

八珍湯

人參 白朮炒 茯苓 甘草炙

當歸 川芎 熟地黃 白芍藥酒

月來血少者。此方主之。○血盛則月來而多。血衰則月來而少。故用當歸川芎芍藥熟地四物以養血。而又用人參白朮茯苓甘草以養氣也。所以必兼養氣者。太極之妙。陰生於陽故也。

固經丸

酒黃芩 龜板 白芍藥各一兩 黃柏炒褐色三錢

樗根白皮七錢半 香附童便浸一宿焙乾三錢

月來過多不止者。此方主之。○月來過多不止。是



陰血不足以鎮守胞絡之火。故血走失而越常度也。是方也。黃芩黃柏芍藥龜板皆滋陰制火之品。所謂壯水之主以鎮陽光也。樗皮之澁所以固脫。香附之辛所以開其鬱熱爾。

白芷黃荊實瓦礫子治白帶考

白帶者胃中濕熱下注而成。猶之溺注于器而生。溺底塗耳前古名醫有單用焦白芷而主者。蓋以白芷之性香而升舉荊實之性辛而利氣瓦礫之性燥而勝濕炒而焦之則火可以生壬土可以防水煉而粉之則燥可以勝濕勝濕則無以下注而白

帶止矣此用三物之意也。

白葵花紅葵花治赤白帶下考

凡久腰膝之間有帶脉奇經八脉之一也。迴身一週如束帶焉。下焦虛損督任有虧則中焦氣血乘虛而襲之陷于帶脉之下。氣病為白血病為赤。各曰赤白帶下也。東垣曰白葵花治白帶紅葵花治赤帶。赤治血燥白治氣燥。此何言哉。豈謂葵花者朝陽之華也。稟草木之陰涵天地之陽故能潤燥而升陽使榮衛上行不復陷于帶脉之下而為帶下也。或問帶下一疾耳。此言氣血陷于帶脉之下為帶下。前言胃中濕熱下注為帶下。何相悖也。余



曰婦人無病容單下白者責之濕熱下注婦人久病赤白並下責之氣血下陷多成瘵也又曰有言白者屬寒赤者屬熱其說何如余曰曾見寒者固有赤帶熱者益多白帶此白寒赤熱之言不足徵矣必若所言則赤白並下者是寒熱並耶見道之言不如如此

千金白馬毛散

白馬毛二兩微和伏火一宿

龜甲四兩醋炙

鼈甲十八銖醋炙

牡蠣一兩十八銖火炙

共為末每服酒下方寸匕日三

治赤白帶下此方良○氣陷于下焦則白帶血陷

于下焦則赤帶以滋藥止之則未盡之帶留而不出以利藥下之則既損其中又傷其下皆非治也白馬得乾之剛毛得血之餘血餘可以固血乾剛可以利氣固血則赤止利氣則白愈此用馬毛之意也龜鼈牡蠣外剛而內柔離之象也去其柔而用其剛故可以化痰可以固氣化痰則赤白之成帶者無復中留固氣則榮衛之行不復陷下榮不陷則無赤衛不陷則無白矣

半夏茯苓湯

半夏 生薑各三銖 乾地黄 茯苓各十銖

旋覆花 白芍藥 人參 芎藭



細辛

橘皮

甘草

桔梗各十  
二銖

孕婦惡阻者此方主之。○惡阻者惡心而防阻飲食也。此是下部氣血不足復盜脾胃之氣以固養胎元故令脾胃自弱不勝穀氣一聞穀氣便惡心而防阻也。是方也。半夏生薑能開胃而醒脾地黃芍藥芎藭能養陰而益血。人參茯苓甘草能和中而益氣乃橘皮桔梗旋覆細辛皆辛甘調氣之品可以平惡逆之氣而進飲食者也。或問半夏為妊婦所忌奈何用之。余曰昔人恐久用而燥陰液故云忌爾。若有惡阻之證則在所必用也。故孫真人方之聖者也。其養胎之劑用半夏者蓋五方焉。

橘皮湯

橘皮

竹茹

人參

白朮各十  
八銖

生薑

兩

厚朴

十二  
銖

妊婦嘔吐不下食者此方主之。○惡阻以聞食而惡責之脾虛嘔吐以食入復吐責之有火所謂諸逆衝上皆屬于火也。此是厥陰之血既養其胎少陽之火虛而上逆竹茹能平少火厚朴能下逆氣橘皮生薑所以開胃人參白朮所以益脾開胃益脾欲其安穀云爾。

白朮條芩考

先醫云白朮條芩安胎之聖藥此何云也蓋以白



木益脾能培萬物之母。條芩瀉火能滋子戶之陰。與其利而去其害。故曰安胎聖藥。

膠艾湯

熟地黃 艾葉 當歸 川芎 炙甘草

真阿膠 炒成珠 各半錢 黃耆 二分

孕婦漏胎不安者。此方主之。○漏胎者。懷胎而點滴下血也。此是陰虛不足以濟。火氣虛不足以固血。故有此證。是方也。阿膠熟地當歸川芎。益血藥也。黃耆甘草艾葉。固氣藥也。血以養之。氣以固之。止漏安胎之道畢矣。

砂仁葱白湯

砂仁 一錢 槌碎 葱白 十枚 煎湯吞下

妊娠腹痛者。此方主之。○痛者。氣血滯澁。不通使然。故用砂仁順氣于下。葱白順氣于中。氣行血利。而痛自止。有故而痛者。各隨證以治之。

犀角散

生犀角 地骨皮 麥門冬 赤茯苓

條芩 生甘草

子煩者。此方主之。○子煩者。懷子而煩悶也。煩悶責心。肺有熱。故用犀角涼心。骨皮退熱。條芩瀉火。麥冬清金。赤苓導赤。甘草和中。

四物湯加芩連薑夏方



當歸 川芎 芍藥 熟地黄

黃芩 黃連 半夏 生薑

子癰者此方主之。○子癰者懷子而癰仆也。此由血養其胎陰虛火亢痰氣厥逆故令癰仆是方也。四物可以養血芩連可以降火薑夏可以破逆

紫蘇飲

紫蘇葉 人參 陳皮去 大腹皮黑豆汁洗過

當歸尾 川芎 粉草 白芍藥酒炒

子懸者此方主之。○胎氣不和湊上心腹腹滿閉悶謂之子懸乃下焦氣實太氣舉胎而上也故用紫蘇腹皮陳皮川芎流其氣當歸芍藥利其血氣

流血利而胎自下矣然必用夫人參甘草者邪之所湊其氣必虛也流氣之藥推其陳補氣之藥致其新爾

地膚草湯

地膚草四兩水四升煎取二升分三服取自然汁服亦可

子淋者此方主之。○懷子而小便淋澀謂之子淋子淋之原本於濕熱地膚草能利膀胱能疏風熱以之而治子淋亦單劑之良也

冬葵子湯

冬葵子炒 柴胡 桑白皮 赤茯苓



赤芍藥

當歸各等分

此亦子淋之方也。○滑可以去着。故用冬葵子。清升則濁自降。故用柴胡。氣化則能出。故用桑皮。辛利則能潤竅。故用當歸。而赤芍者。取其入血而利丙丁也。

木通散

木通

紫蘇葉

香薷

桑白皮各一錢

枳殼

檳榔

條芩各五分

訶子皮

木香各三分

妊娠身體浮腫。四肢脹急。小便不利者。此方主之。○妊娠氣血朝胎。榮衛之行澁。故令身體浮腫。四

肢脹急而小便不利也。是方也。紫蘇流氣于表。桑皮枳殼木通木香檳榔流氣于裏。香薷流氣中之濕。條芩流氣中之熱。訶子流氣中之液。服藥之後榮衛流行。氣血健運。則浮腫諸疾可得而皆愈矣。或問何以不利小便。余曰。內經有言。氣化則能出矣。故知本之醫。只調其氣。無用淡滲為也。

三合湯探吐法

人參

白朮

茯苓

甘草

當歸

川芎

芍藥

地黃

半夏

陳皮

妊娠轉胞。不得小便者。此湯服之。探吐數日。愈。○胞非轉也。由孕婦中氣怯弱。不能舉胎。胎壓其胞。



胞繫子矣。而小便不通耳。故用二陳四物四君子三合煎湯而探吐之。所以升提其氣。上竅通而下竅自利也。

東胎丸

白朮二兩

茯苓七錢半

陳皮三兩不  
見火

黃芩

夏一兩春秋  
七錢冬五錢

姙娠七八月間服此胎氣斂束令人易產。○凡患產難者。多由內熱灼其胞液。以致臨產之際。乾澀而難。或脾氣怯弱。不能運化精微。而令胞液不足。亦產難之道也。故用白朮茯苓益其脾土。而培萬物之母。用黃芩清其胎熱。瀉火而存胞液。乃陳皮

者取其辛利能流動中氣。化其肥甘。使胎氣不滯。兒身勿肥耳。此東胎之義也。

達生散

大腹皮

三錢黑豆汁  
洗晒乾入劑

陳皮

紫蘇

當歸

白芍藥

白朮

各一錢

炙甘草二錢

姙娠臨月。此方服之。令人易產。○詩云。誕彌厥月。先生如達。朱子曰。先生首生也。達。小羊也。羊子易生而無留難。故昔醫以此方名之。然產難之故。多是氣血虛弱。榮衛澁滯使然。是方也。人參白朮甘草益其氣。當歸芍藥益其血。紫蘇腹皮陳皮流其滯。氣血不虛不滯。則其產也。猶之達矣。



車前子

詩曰采采芣苢薄言采之芣苢車前也朱子曰采之未詳何用其子治產難得其說凡遇姙娠臨月於宜用湯液內加之每良

催生諸藥考

生不必催也催之則宋人之握苗耳非惟無益而又害之矣古方有用兔腦者有用猪脂者有用油蜜葱白者有用葵子者有用牛乳榆皮滑石者有用金鳳子者有用柰枝者取其滑澤之義耳猶近理也又有用鬻牙灰者有用蛇退灰者有用筆頭灰者有用百草霜者有用伏龍肝者有用鑿頭灰

孟子有闕其苗之不長而掘之者

者有用蓖麻子貼于足心者有握石燕者雖曰各有深意但燒灰而服者徒劫燥其津液手握足貼者用之弗驗耳噫平時失於將理至於臨產艱難頗以雜藥催之皆惑也

十全大補湯

人參 黃耆 白朮 白芍藥 茯苓

當歸 川芎 甘草 熟地黄等分 肉桂少許

正產之後氣血虛耗者此方主之小產者亦此方主之○氣虛宜補氣故用人參黃耆白朮茯苓甘草血虛宜補血故用當歸川芎芍藥地黃肉桂丹溪曰產後宜大補氣血此之謂也



桃仁紅花蘇木玄胡索肉桂山查蒲黃考

產後有瘀血留于子宮作痛者宜四物湯加主件

黑神散

熟地黃

炒蒲黃

炒黑乾薑

當歸

白芍藥

桂心各二兩

炙甘草三錢 黑豆二台半炒去皮

上件共為末每服二錢童便和酒調下

胎死腹中此方主之○胎死者產難經日而胎死也法以姪娠舌頭青黑為驗是方也蒲黃能逐敗血熟地芍藥當歸能養新血乾薑肉桂能引新血而逐敗血甘草黑豆能調正氣而逐敗氣師云此

千金神造湯

方更治胞衣不下產難血暈餘血奔心兒枕疼痛乍見鬼神等證蓋諸證皆是瘀血為患故立治之

蟹爪木

阿膠三兩

甘草二兩

婦人脈陰陽俱盛名曰雙軀若少陰微緊者血即凝濁經養不周胎即偏大其一獨死其一獨生不去其死害母失胎宜此方主之○蟹爪能破胞而墮胎以其稟鋒利之質故耳非姪娠所宜也是方也蓋用蟹爪攻其死阿膠安其生甘草平其毒也或問蟹爪之毒寧保其不傷彼生者乎余曰無死者則傷生有死者則毒以類從惟攻其死不犯其



生此本易方以類聚物以群分水流濕火就燥之義也。

**獨參湯**

人參二兩

水一升煎半升溫服

產後血暈不省人事者此方主之。○血暈者下血過多而眩暈也。不省人事者氣血大脫而神不用也。故用人參甘溫益元之品以主之。此藥可以固氣可以生血可以益元身熱氣急者加童便一爵身寒氣弱者加附子三錢。

**醋炭薰鼻法**

凡血暈不省人事者急治炭火以醋醋沃之使醋

氣薰蒸入鼻則能收斂神氣自然精爽。

**紅花酒**

紅花炒一兩

清酒五爵沃之溫服。

胞衣不下此方主之。○胞衣不下者氣弱而瘀血盈於胞也故用清酒壯其氣紅花敗其瘀。

**猪腎湯**

猪腎具一

白糯米合三

淡豉合五

葱白升一

人參

當歸各二兩

產後羸勞者此方主之。○羸產中之名也。產中虛羸喘乏乍寒乍熱病如瘡狀名曰羸勞此是虛乏氣血不相順接虛故乍寒。壅故乍熱寒熱無時休



息證狀似癰實非癰也。治宜大補氣血。使其氣血順接。則病愈矣。故用人參補氣。當歸補血。糯米益胃。葱豉醒脾。而循腎者。取其以類相從。能補系胞之區也。

升陽舉經湯

羌活 藁本去土 防風各二錢 肉桂去皮夏勿用秋冬用  
白朮 當歸 黃耆 柴胡各三錢  
人參 熟地黄 川芎各一錢 細辛六分  
獨活 炙甘草 附子炮去皮臍各一錢五分  
桃仁十枚去皮尖 白芍藥 紅花各五分  
婦人經血崩下者。此方主之。○血氣人身之陰陽

也。陽主升。陰主降。陽根乎陰。陰根乎陽。一動一靜。互為其根。則一升一降。循經而行。無崩陷也。若陽有餘。則升者勝。血從上竅而出。陽不足。則降者勝。血從下竅而出。是方也。附子肉桂。人參黃耆。白朮甘草。壯陽益氣之品也。羌活獨活。柴胡藁本。防風細辛。川芎。升陽舉經之品也。芍藥。地黃。紅花。當歸。桃仁。滋陰入血之品也。壯陽則氣不虛。舉經則血不陷。滋陰則血不燥。誠如是。則血為氣之守。氣為血之衛。血管于中。氣衛于外。升降上下。一循其經矣。胡然而崩也。

獨活湯



獨活 生薑各一兩 防風

秦艽 桂心 白朮

甘草 當歸 附子各二兩

葛根三兩 防已一兩 時人分作十服

產後中風口噤背反者此方主之。○產後血氣俱虛易受風寒風傷乎筋則痙寒傷乎筋則疼故冷口噤背反是方也。獨活防風秦艽葛根防已疏風藥也。桂心附子驅寒藥也。風去則筋不痙寒去則筋不疼乃當歸者所以養血于驅風之後生薑白朮甘草者所以調氣于散寒之餘必欲養血調氣者產後不忘其虛也。

芎藭酒硝石飲

史記蜀川王美人懷子而不乳召淳于意往視與芎藭葉一撮以酒飲之旋乳意復診其脉而脉躁躁者有餘病即飲以硝石一劑出血血如豆比五六枚○乳產也懷子而不乳者氣血凝澁宜產而不產也芎藭能行痺氣酒性能行滯血故主之而旋乳復診其脉躁躁屬有力故為有餘有餘之疾宜攻矣故用硝石以下其積血

當歸補血湯加葱白方

當歸二錢 黃耆一兩 葱白十枚

產後無乳者宜此方主之○乳者氣血之所成也



故氣血充盛之婦未嘗無乳凡見無乳者皆氣體怯弱之婦也是方也。用當歸黃耆大補其氣血此養乳汁之源也。葱白辛溫直走陽明陽明達於乳房故用之為使。此通乳汁之渠也。如依古方用猪懸蹄漏蘆輩亦可。

免懷湯

當歸尾 赤芍藥 酒紅花 酒牛膝各五錢

欲摘乳者此方主之。○婦人之血下則為月上則為乳。欲摘乳者通其月事則乳汁下行。免乳脹之苦矣。是方也。歸尾赤芍紅花牛膝皆下行導血之品也。以故用之各名曰免懷者。子生三年然後免於

父母之懷故也

廣嗣門 第七十一

叙曰。嗣以行宗微嗣匪孝也。君子恒重之。故郊禘之祀尼丘之禱。古人胥急焉。然有祈之藥之終身不嗣者。此何以故哉。嗟夫。天地有不毛之慶。故亦有無子之人。靈樞所以泄其微也。茲考方藥五條。道其能嗣者爾。

長春廣嗣丹

人參去蘆 天門冬去心 當歸酒洗

天子祀曰禘



澤瀉去毛

山茱萸去核

石菖蒲炒

赤石脂

五味子去梗

覆盆子去萼

白茯苓

車前子

廣木香

栝子仁各一兩

山藥姜汁炒

川巴戟去心

川椒去目與梗及閉口者炒出汗

熟地黄

川牛膝去蘆酒洗

杜仲各二兩

遠志去蘆茸草湯泡去心

地骨皮去木與土

肉蓯蓉酒洗去心膜晒乾

枸杞子各三兩

兔絲子酒洗去土仍用酒蒸搗餅晒乾四兩

上藥廿五味煉蜜作丸梧子大每服三十九日

三

男婦艱嗣者此方主之。○二五之精妙合而疑然後成形孕育故求嗣者宜實其精世人益精專於補腎此求其末也。經曰腎者主水受五藏六府之精而藏之故五藏盛乃能寫如斯言之則腎主藏精耳而生精之原固本于五藏六府也是方也。人參天門冬五味子用之補肺石菖蒲栝子仁當歸遠志用之養心白茯苓懷山藥用之養脾山茱萸熟地黄覆盆杜仲牛膝巴戟從蓉枸杞兔絲用之補肝腎所以然者肝腎同一治也。乃車前澤瀉利其灼陰之邪生地骨皮平其五藏之火石脂之澁所以固精木香之竄所以利六府用椒之辛所以



散濕痺也。此則兼五藏六府而調之。五藏之精實  
六府之氣和。夫然後可以媾精而宜子矣。非得肉  
經之旨者不能識此。

延齡育子方

- |                       |                        |                       |
|-----------------------|------------------------|-----------------------|
| 天門冬 <small>味</small>  | 麥門冬 <small>味</small>   | 川巴戟 <small>味</small>  |
| 人參                    | 白朮                     | 白茯苓                   |
| 川牛膝                   | 生地黄                    | 熟地黄                   |
| 肉蓯蓉 <small>心去</small> | 枸杞子                    | 兔絲子                   |
| 蓮鬚                    | 白茯苓                    | 山藥 <small>姜汁炒</small> |
| 山茱萸 <small>核去</small> | 沙苑蒺藜 <small>炒</small>  | 栢子仁                   |
| 鹿角膠                   | 鹿角霜 <small>各五兩</small> | 酸棗仁                   |

遠志

五味子

石斛各二兩

上藥共為末。蜜丸。梧子大。早晨鹽湯吞下百丸。  
此亦廣嗣之方也。○男女媾精。乃能有孕。然精者  
五藏之所生。而藏之腎者也。故欲藏精于腎者。必  
調五藏。五藏盛而精生矣。是方也。人參。五味。天麥  
門冬。補肺藥也。茯苓。遠志。栢仁。棗仁。生地。補心藥  
也。白朮。茯苓。山藥。石斛。補脾胃也。熟地。枸杞。兔絲  
巴戟。牛膝。茱萸。蓯蓉。沙苑。蒺藜。補肝腎也。鹿角膠。  
血氣之屬。用之。所以生精。角霜。蓮鬚。收澁之品。用  
之。所以固脫。如是。則五藏皆有養。而精日生。乃能  
交媾。而宜子矣。



葦子。小茴香。蛇床子。川椒。天雄。附子。總考。

此六物者溫熱之品也。取之者何。凡人艱嗣者多。有下虛而胃中之濕襲之內生。胞痺腎痺白帶之疾。故令精寒而不嗣也。能於此數物酌而用之。則痺去而宜子矣。

黃芩。黃連。黃柏。梔子考。

世人謂精寒者不宜嗣。率以溫煖之劑主之。此不可執也。蓋天地沖和而萬物發育。朔方寒勝固令不毛。南服蒸炎亦令焦土。明於精寒不嗣。昧於血燥不胎。非良手也。故述芩連柏以爲廣嗣者告。能令氣血沖和則生生之道矣。

朔方也

峻鹿陰也

人胞。鹿茸。麋茸。鹿峻。蛤蚧。龜板。猪脊髓。總考。

凡年高精弱難於生育。草木無情不能補之。故宜上件酌而入藥。蓋取其爲血氣之屬。補之易易爾。

延年門第七十

叙曰。服食引年術之末也。能寡慾以至無慾。斯長生矣。故慾不滅則苦亦不滅。苦不滅則生滅雖令太乙。製方神皇品藥。軒轅切問。廣成烹調。亦天殃道耳。胡年之延哉。茲考方藥七條。述醫云。爾他如金丹玉液之術。則吾不敢爲斯世誑也。



九蒸地黄

地黄味厚為陰中之陰故能滋養陰血必欲九蒸者欲其氣味純和云爾

九蒸黃精

黃精氣味與地黄等故可以生長陰精真人云又服能脫舊膚美顏色烏鬚黑髮長生引年

百鍊松脂

不見風日者良

松且千年不謝傲霜雪不凋以其脂實也服食家用之亦欲其松其身而千其年尔

雲母水方

上白雲母二十斤薄擘以露水八斗作湯分半

洮洗雲母二次又取二斗作湯內芒硝十斤以雲母木器中漬二十日陰乾於木石臼中揉極細得好粉五斗餘者棄之每好粉一斗用崖蜜二斤攪冷如粥入生竹筒中削去竹青漆固其口埋入地中入土六尺覆之春夏四十日秋冬三十日出之當如澤為成若洞洞不消者更埋三十日出之服時取水一合內藥一合攪和服之日三

孫真人云此藥服十日小便變黃是先療勞氣風疹也二十日腹中寒癘消三十日齟齬更新生四十日不畏風寒五十日諸病皆除顏色日少長生



延年

自溺

老人夜卧口乾舌液取自己溲溺時進一杯能長生引年此以吾身之坎交吾身之離謔稱輪迴酒是也。

玄黃丹

硫黃製一

青黛飛一兩六錢

用硫黃為丸青黛為衣

老人寒痰內盛者此方服之去疾延年○硫黃火之精也人非此火不能以有生故用之以益火以青黛為衣者制其燥咽云尔○硫黃詳論在虛損

勞瘵門補火丸下

鹿峻鹿血鹿角膠鹿茸麋茸猪脊髓總考

老弱之軀木石不能榮養氣血故用上件血氣之屬入藥調和以配服食取其以類相從榮養易易耳七十非肉不飽亦是此意

醫方考卷之六終



慶安四辛曆仲秋吉辰  
寺町通圓福寺町秋田屋平左衛門刊行



